

সারা বিশ্বে মাতাল করে সেমিফাইনাল পর্বে এসে পৌঁছেছে বিশ্বকাপ ফুটবল। গ্রেটস্ট শো অন দ্য আর্থ। দুর্দান্ত খেলেই সেমিফাইনালে উঠে এসেছে ব্রাজিল, জার্মানি, দক্ষিণ কোরিয়া, তুরস্ক। তবে এবারের বিশ্বকাপে প্রতিটি পর্বে ঘটেছে নাটকীয় ঘটনা। অতীত বিশ্বকাপের অ ঘটনাকে ম্লান করে দিয়েছে। এবারের বিশ্বকাপ হয়ে উঠেছে ফেভারিটের খ্যাতিতে নয়, ক্রীড়ানৈপুণ্যের যোগ্যতায় টিকে থাকার সত্যিকার লড়াই।

বিশ্বকাপে ইতিহাসের জন্ম দিয়েছে পশ্চিম আফ্রিকার ক্ষুদ্র দেশ সেনেগাল। বিশ্বকাপের উদ্বোধনী ম্যাচে আফ্রিকার তেরঙ্গা সিংহের দল বিশ্বচ্যাম্পিয়ন ফ্রান্সকে হারিয়ে দিয়ে ফুটবলবোদ্ধাদের অবাক করে দেয়। তাদের আগাম হিসেবের খাতা যায় পাল্টে। এশিয়ার স্বাগতিকেরা অপ্রতিরোধ্য হয়ে ওঠে। প্রথম পর্ব থেকে ফেভারিট আর্জেন্টিনা, ফ্রান্স, রাশিয়া, পর্তুগাল ছিটকে পড়ে। দুর্দান্ত প্রতাপে দ্বিতীয় পর্বে উঠে আসে এশিয়ার পতাকা নিয়ে দক্ষিণ কোরিয়া ও জাপান। নবাগত সেনেগাল।

নকআউট পর্বে জমে ওঠে আরো নাটকীয়তা। দারুণ প্রতিদ্বন্দ্বিতাপূর্ণ খেলায় ইংল্যান্ড হারিয়ে দেয় ডেনমার্ককে। নবাগত সেনেগালের কাছে ২-১ গোলে পরাজিত হয় অভিজ্ঞ সুইডেন। আয়ারল্যান্ডকে হারিয়ে দেয় স্পেন। যুক্তরাষ্ট্রের কাছে ২-০ গোলে হেরে যায় মেক্সিকো। গোল্ডেন গোলে ইটালিকে হারিয়ে প্রথমবারের মতো কোয়ার্টার ফাইনালে পৌঁছে যায় স্বাগতিক দক্ষিণ কোরিয়া। তবে তুরস্কের কাছে হার মানতে হয় অপর স্বাগতিক জাপানকে। বেলজিয়ামকে দুই গোলে পরাজিত করে সাম্রা নাচের দেশ ব্রাজিল উঠে আসে কোয়ার্টার ফাইনালে।

বিশ্বকাপ জমে উঠেছিল কোয়ার্টার ফাইনালে। চমৎকার খেলে ২-১ গোলে হারিয়ে সেমিফাইনাল নিশ্চিত করে ব্রাজিল। এক গোলে পিছিয়ে পড়েও ব্রাজিল রিভালদোর গোলে সমতা ফিরিয়ে আনে। ফ্রি-কিক থেকে রোনালদিনহার চমৎকার গোল ব্রাজিলকে পৌঁছে দেয় সেমিফাইনালে। বিশ্বের কোটি কোটি ব্রাজিলভক্ত শ্বাসরুদ্ধকর এ ম্যাচ শেষে ভেসে যায় আনন্দের সাগরে। আনন্দে আত্মহারা হয় ব্রাজিলভক্ত বাঙালি। তবে রেফারির বিতর্কিত লাল কার্ডের কারণে দর্শক সেমিফাইনালে রোনালদিনহাকে দেখতে পাবে না। তিনি এখন ব্রাজিলসহ সারা বিশ্বের তারকা। টাইব্রেকারে স্পেনের সঙ্গে ম্যাচ জিতে প্রথমবারের মতো এশিয়ার দেশ দক্ষিণ কোরিয়া উঠে আসে। সেমিফাইনালে অভাবনীয় উত্থান তাদের। নবাগত সেনেগালকে গোল্ডেন গোলে হারিয়ে ৪৮ বছর পর বিশ্বকাপে খেলতে আসা তুরস্ক উঠে যায় সেমিফাইনালে। স্বাভাবিক খেলেই জার্মানি আমেরিকাকে হারিয়ে সেমিফাইনালে চলে আসে।

সেমিফাইনালে এসে বিশ্ববাসী চেয়ে আছে যোগ্যতার লড়াই দেখতে। চলছে আবার হিসাব কষা। বিশ্বকাপ কি পঞ্চমবারের মতো ঘরে তুলবে ব্রাজিল! নাকি বিশ্বকাপ থেকে যাবে ইউরোপে। তবে এশিয়াবাসীর আশা বিশ্বকাপ জিতে নিক দক্ষিণ কোরিয়া। গর্বিত হোক এশিয়ার তিনশ' কোটি মানুষ। পঞ্চমবারের মত বিশ্বকাপ জয়ের আনন্দে মেতে উঠতে ব্রাজিলভক্তদের চলছে প্রস্তুতি। কিন্তু শেষ ফলাফল দেখার জন্য অপেক্ষা করতে হবে ৩০ জুন পর্যন্ত।

দেশে আকস্মিক রাষ্ট্রপতির পদত্যাগ, সেনাপ্রধানের অপসারণ, বিরোধীদের সংসদে ফিরে যাবার মতো সিদ্ধান্ত দেশের রাজনীতিতে তোলপাড় সৃষ্টি করছে। বিশ্বকাপের আনন্দ রাজনীতির এ খেলাকে মলিন করে দিয়েছে।

